

REGIONAL NEWS

HEADLINES:-

1. Mizoram chaklakna ber Aizawl leh Silchar inkar kawngpui a chhiat lutuk avanga tuialhthei harsatna thleng chuan zia-awm lam a pan chhoh beisei a ni.
2. Myanmar ram Chin state a sipai sorkar dotu 'Zofa' pawl hrang hrang zinga inrem lohna awm thin chinfel tumin nimin khan pawl 4-in inremna an ziak.
3. Mizorama sahimna zawnga lo lut raltlante buhfai a tanpuina tur chungchangah sorkar laipui leh Mizoram sorkar an indawr mek.
4. Tuilianin Bihar district engemawzat a tibuai zui zel.

<><><>

OIL SCARCITY

Mizoram chaklakna ber Aizawl leh Silchar inkar kawngpui a chhiat lutuk avanga tuialhthei harsatna thleng chuan zia-awm lam a pan chhoh beisei a ni.

Food, Civil Supplies and Consumer Affairs director Pi Saizikpuii chuan Silchar leh Aizawl inkar kawngpui chhiat avang leh chumi nghawng a petrol leh diesel phur lirthei khalhtute an nawrh avanga Mizorama tuialhthei harsatna chu a zia-awm chhoh a beisei thu a sawi a. Tunah hian tuialhthei phurtu lirthei tangkhangte an rawn chhuah chhoh mek avangin naktuk, Thawhtanni lam atang hi chuan petrol leh diesel dinhmun a that chhoh leh an beisei thu a sawi a ni. Mizoram chaklakna ber Aizawl leh Silchar inkar kawngpui a bik takin Kawnpui leh Khamrang inkar leh Sethawn a chhiat lutuk avangin tuialhthei leh bungraw phur truck engemawzat a tangkhang a. Kawng chhe zual lai hi PWD-in khawl leh mihring tha hmangin kar kalta Ningani atang khan kawngpui chhe zual lai siamthat hna an thawk tan a, ruahtui a tlak reng tawh loh avang leh a chhe zual lai siamthat a nih tawh avangin Zirtawpni tlai khan Assam lam pan tur truck ruakte chhuahin nimin tlai khan helam rawn pan mekte chu chhuah leh an ni.

Nimin tlai a lo chhote hi a tir lam an tlang theih lai-in zan dar 10 hma deuh khan Kawnpui leh Khamrang inkarah truck pakhat kawng nalah a tang a, hei hian tam tak a dang zui leh a, zing khawvar hma-in kawngpui hi a tlang leh thei ta ni a thudawn a ni.

Tuialhthei phurtu pawl Mizoram Oil Tanker Driver Association (MOTDA) leh Petroleum Entrepreneurs and Transporters Union of Mizoram (PETUM) te chuan kar kal ta Thawhlehi atang khan Aizawl leh Silchar inkarah tuialhthei phurte an tlantir lova, mahse, kawng chhe zual lai siamtha tura sorkarin ruahmanna a siam tak avangin an nawrh hi an titawp leh a ni.

Chaklakna kawngpui chhe lutuk avanga lirthei a kaltlang hleih theih loh avang hian tuialhthei a vangin to tak taka hralh a ni a. Mipui nitin mamawh phai lam atanga lakluh pawh lei tur a avangin a man pawh a sang chak hle a ni.

<><><>

CHAKMA PERSECUTION

Central Young Chakma Association (CYCA) chuan Bangladesh Chittagong Hill Tracts a Dighinala Sadar leh Rangamati khua ami Chakma 9 lai thah an ni chu an dem thu an sawi.

Inrinni khan CYCA hian thuchhuah siamin kar kal ta Ningani khan misual rualin Chakma mi 9 that-in chenna in leh Buddhist biakin 100 vel an hal a. Mi engemawzat an hliam bakah chenna in chhuahsan engemaw zat an awm niin an sawi. Hemi chungchangah hian India rama Chakma pawlte chuan Prime Minister Narendra Modi hnenah ziaka thu thlenin Dr Mohammed Yunus-a kaihhruai Bangladesh sorkar lailawk nena inbiakna buatsaih rih lo turin an ngen a. An lehkha thawnah chuan mi 9-in nunna an chan thu leh in 100 chuang hal a nih thu an tarlang a. Bangladesh sipaite chuan hetiang a Chakma mite laka tharum thawh lai hi an thlir mai mai niin an sawi. Lehkathawnah hian Chakma Development Foundation of India dintu Suhas Chakma, Chakma Autonomous District Council CEM Rasik Mohan Chakma, minister hlui leh National Commission for Scheduled Tribes member Nirupam Chakma leh Assam leh Tripura a Chakma hruaitu mi 6-in an hming an ziaak a ni.

An lehkha-ah chuan Bangladesh Chittagong Hill Tracts a tlangmi chengte himna atana awmze nei a hma lak a nih hma chuan India sorkarin Bangladesh sorkar nena inlaichinna tha pangngai kalpui lo se an phut tih an tarlang a. Khawvel ram hrang hrangte pawh Chittagong Hill Tracts a tlangmite tihduhdah leh rahbeh an nih chungchang chu auchhuahpui a, Bangladesh sorkar hi thunun turin an ngen a ni.

<><><>

PEACE PARLEYS

Mizoram thenawm Myanmar ram Chin state a sipai sorkar dotu 'Zofa' pawl hrang hrang zinga inrem lohna awm thin chinfel tumin nimin khan pawl hrang palite chu ZoRO uapna hnuai-ah inbia-in inremna an ziaak.

Chinland Government leh Chin National Front (CNF) tangrual mekte leh Interim Chin National Consultative Council (ICNCC) leh Chin Brotherhood aiawhte hi Adviser to chief minister, ZoRO vice president ni bawk Pu Lalmuanpuia Punte pisa-ah an inbia a. He inbiakna-ah hian inremna thuthlung an siam in Zofate (Chin-Kuki-Mizo) chu thlahtu thuhmun, tawng khat hmang (Same language - different dialect), nunphung thuhmun, serh leh sang inkhawih pawlh, beiseina thuhmun vuana dam leh tlang khatah, thih leh ruam khatah ti thin unau an ni tih an pawm a. Ram leh hnam tana hma an lakna kawngah an thahnemngaih luat avanga unau an inhmu thiam lo chu pawl an tih thu leh, tun hnuah thleng tawh lo se an duh thu an tarlang a. Tun hnuah buaina leh harsatna a lo awm pawhin tharum leh ralthuam che lek zawng a hmalak loh ni se, an ti a , ZoRO hmalakna a inremna thuthlung sawiho chu tha an tih thu leh an pawm a thu sawiin inremna tluantling a awm theih na'n aatul dan a zira inbiakna neih leh nise an ti a, meeting leh hunah inremna committee din nise tih an thuthlungah chuan an tarlang bawk a ni.

He inremna thuthlungah hian Chinland sorkar aiawhin Chin state chief minister Pu Pa Thang leh CNF aiawhin an pawl vice chairman-1 Pu Thang Ning Kee ten an hming an ziaak a. ICNCC aiawhin Chin state chief minister hlui Salai Lian Luai leh Chin Brotherhood aiawhin Pu Paw Sila

te chuan an hming an ziah ZoRO aiawhin an president Pu R. Sangkawia leh general secretary Pu L. Ramdinliana Renthlei te'n an hming an ziah hnan ve bawka ni.

Pu Lalmuanpuia Punte chuan inremna lam hawi a ke pen a, remna palai an rawn kal tha chu lawmawm a tih thu a sawi a. Cin state a Zofa unaute inrem chu Mizoram sorkar duhdan a ni a, Aizawla an inkawmkhawmna pawh sorkarin a hriatpui a ni, a ti a. Sorkarin ZoRO kaltlangin remna palai hna an thawk tih sawiin, India Sorkar pawh hian pawl hrangte inrem hi a duh a, tanpuina pek pawh a duh a ni." a ti.

Pu L. Ramdinliana Renthlei chuan ZoRO in remna palai hna an thawh chhan sawiin, Zofate chu unau vek an ni a, inhmu thiam lo tur an ni lo a, tangrual tur zawk an ni, a ti a. Unau an nih angin inthen thei an ni lo a, indo thei pawh an ni lova, Zofate chu khawi hmunah pawh awm se la lungrual taka awm tur an ni a ti a, Mahni hnampuite hmelmaah an insiam tur a ni lo a, hmelma thuhmun nei tlang zawk tur an ni, a ti. Zofate chu Pathian ringtu, an nih angin, engtik ni-ah emaw chuan inremin an la awm anga an la insuihkhawm vek dawn a ni." a ti a ni.

<><><>

REFUGEE AID

Mizorama sahimna zawnga lo lut raltlante buhfai a tanpuina tur chungchangah sorkar laipui leh Mizoram sorkar an indawr mek.

Home department hotute hnen atanga thu dawn danin raltlante chhawmdawlina atana cheng vaibelchhe 5 hu buhfai sorkar laipui-in a rawn pek tur chungchangah Ministry of Home Affairs nen an indawr mek a. Union Home Secretary an inthlak hlim deuh chauh a nih avangin he ruahmanna hi a kal muang ta deuh a. Bawhzui mek zel a ni, an ti a. Buhfai cheng vaibelchhe 5 hu hi Ministry of Consumer Affairs, Food and Public Distribution-in a rawn pek tur a nih lain a man hi Ministry of Home Affairs-in a tum ang a. Buhfai hi Myanmar, Bangladesh leh Manipur atanga rawn raltlante hnena a thlawna sem tur a ni. August ni 14 khan Ministry of consumer affairs, food and public distribution a under secretary chuan hemi chungchangah hian Mizoram food, civil supplies and consumer affairs secretary hnenah lehkha rawn thawnin a thlawna buhfai an rawn pek tur hi metric ton 1,379 leh quintal 34, cheng vaibelchhe 5 hu a nih thu a rawn hriattir a ni.

Sorkar laipui ruahmanna ang chuan buhfai an rawn pek tur hi ni 60 chhunga pek fel hman tur a ni a. Tunah hian ni 38 vel hun a kal tawh a. A phurh chhoh dan tur leh thil tul dang buaipui-in sorkar laipui leh Mizoram sorkara a mawhphurtute an indawr chho mek zel a ni. Tun dinhmunah Mizoramah raltlan mi 44,000 vel an awm a. Myanmar atanga lo lut mi 34,000 thelh, Manipur mi sang 8 thelh leh Bangladesh atanga lo lut 2,000 chuang hret an awm mek a ni.

<><><>

BIHAR FLOODS

Tuilianin Bihar district engemawzat a tibuai zui zel a, Patna, Begusarai, Saran leh Munger dist-ten an tuar nasa zual a ni. Ganga lui leh a peng lui hrang hrang lian hian mi nuai 10 chuang a tibuai a, rel service-te pawh a khaihlak phah nasa hle a ni.

Bariyapur leh Munger inkar National Highway 80-na pawh tuilianin a chim avangin lirthei an tlan hlei thei lova, tuilian hian chenna in tam tak a chim tawh avangin mi thahnem tak, chenna nei lovin an awm mek a ni.

UP FIRE

Uttar Pradesh Kanpur Dehat Dist-a nimina khum mattress siamna factory-a kangmei chhuakah mi 6 an thi a, midang engemawzatin hliam an tuar bawk. Vanduaina hi Rania Industrial hmuna thleng a ni a, electric current kal sual vanga kangmei hi chhuak ta niin police-te chuan an sawi a, eirawngbawlna gas bur puak vangin factory inchung hi a chim chhe vek bawk.

<><><>